

Tanṭan̄a tsghatá lwa 1 Yuhwana

Gwada Lazglafta ná, ta vlay ta hafu

¹ Nana skwi ta vindaghunafta ḡni na ná, gwada ta ghəṇa mndu ta vla hafu ta nzakway daga ta kul zraftá* inda skwi ya. Ta ghəṇa skwi snaṇ ḡni nda skwi nghan ḡni nda ira ḡni, nda ya vitsanava ḡni, nda ya ksana ḡni nda dzva ḡni ta mnaghunata ḡni.

² Na zlagapta tsa mndu ta vla hafu ya, ka nghanṭá aṇni nda ira ḡni. Tsaya kəl aṇni ka nzakway ka masləm̄tsəkani, kəl ḡni ka mnay ḡa ghuni ta gwada ta hafu ḡa kdekeden si ta nzaku tavata Da mu, ka maravatá† tsi ta wa ira mu. ³ Tsa skwi nghan ḡni nda ya snaṇ ḡni ya, tsaya ta mnaghunata aṇni kada nzakwa kuni nda guya nda aṇni. Ka nda guya ghəṇa mu katsi, nda guya ghəṇa mu kawadaga nda Lazglafta Da, nda ya nda zwanani Yesu Kristi. ⁴ Kada kd̄iṇta rfa mu‡ ta ndəghafta ta kəl ḡni ka vindaghunaftá na skwiha na.

Mbada ma tsuwadək

⁵ Tsuwadaka nzakwa Lazglafta, had skwi ka grum da tsi wu, na skwi snaṇ aṇni da tsi, ta mnaghunata aṇni. ⁶ Ka nda guya ghəṇa mu nda Lazglafta ka mu katsi, ta ghəṇa tsa tata mbada mu ma grum, tsakalawi tsa ta tsakalə mu, maga a mu ta skwi tdukwa wa. ⁷ Ala ka si ta mbadə ma

* **1:1** Gray nda 2:13. Yuhwana 1:1. † **1:2** Ngha ta Yuhwana 1:14.

‡ **1:4** Rfa mu: Ma sana vliha ná, rfa ghuni.

tsuwadak mu ta mbađa manda nzakwa Lazglafta ma tsuwadak ya, nda guya ghəŋa mu sani nda sani nda tsa ŋa ghubimista usa Yesu Zwaŋa Lazglafta ta inda dmakuha mu.

⁸ Ka had mu ta ga dmaku wu ka mu katsi ná, nana ghəŋa mu ta nanə mu, had kahwathwata ma amu nda tsa wa. ⁹ Ala ka si mnigimna mu ta dmakwa mu nda wa mu katsi, dza'a plimispla Lazglafta ta dmakwa mu, ŋa ghubintani ta inda dmakwa mu, ŋa nzakwa mu tsuwedek ta kəmani, kabga tsatsi Lazglafta tdukwa. Skwi mna tsi ta magamaga manda va tsaya. ¹⁰ Ka ta ga amu ta dmaku wu ka mu katsi, ta tsakalawi Lazglafta ka'a mu nda tsaya. Had tsa gwadani ya ma ndufu mu nda tsa tama wa.

2

¹ Zwana da, skwi kəl yu ka vindaghunafta na skwi na ná, vindaghunaf vinda yu ŋa mbəl ŋa waray ghuni ta maga dmaku. Ala ka si magamaga mndu ta dmaku katsi, mamu mndu tdukwa ta nzaku tavata Lazglafta ta kla lwa mu ŋani. Tsa mndu ya, Yesu Kristi ya. ² Tsatsi ta mtuta ŋa pla ghəŋ kada plimista Lazglafta ta dmakuha* mu. Nza a ŋa pla dmakuha amu ndaghəŋa mu wu, laviŋlava ta pla dmakwa inda mnduha ta ghəŋa hadik demdem guli.

Lfida zlahu

³ Ka ta magay mu ta skwi ta mnamata Lazglafta katsi ná, tsaya ta maramanŋa kazlay: Nda sna mu kahwathwata ta Lazglafta kə'a. ⁴ Ka ka mndu

§ 1:9 Gray nda Zabura 32:1-5. * 2:2 Gray nda Ruma. 3:25-26.

mantsa, «nda sna yu ta Lazglafta,» ka'a, ta sna a ta skwi ta mnata Lazglafta kay guli wu, tsa mndu ya ná, ta tsakalawi. Had kahwathwata dekedek ma nudufani wa. ⁵ Mndu ta snatá gwada Lazglafta ná, dvudva ta Lazglafta kahwathwata. Tsaya ta gramafta kazlay: Nda ndi'a mu nda Lazglafta ka'a. ⁶ Ka nda ndi'a nzakwa da kawadaga nda Lazglafta, ka mndu katsi ná, ka maga tsi ta skwi manda na Yesu Kristi.

⁷ Zwanama da, ka lfidani a na zlahu ta vindaghu-nafta yu na wu, va tsa zlahu manda ghalya yeya. Nda sna kuni ta tsa zlahu ya daga ma zrafta† mnaghunata gwada Lazglafta. Va tsaya tsa gwada sana kuni ya. ⁸ An mndani, lfidani na zlahu ta vindaghunafta yu na, kabga nzakwa Yesu Kristi ná, varda lfi da nzaku ya maraman tsi. Mantsa ya kaghuni guli. Manda skwi ta had grum tama wu, ta zlagazlagu varda tsuwadak.

⁹ Ka «ma tsuwadak yu» ka mndu ta gray, tata husanhusa zwanamani ta nzakway ma zlg hay nda nuduf katsi ná, ta ma grum tsa mndu ya manda va nzakwani ghalya. ¹⁰ Ala ka ta dvay mndu ta zwanamani katsi, nda nza nzakwa tsa mndu ya ma tsuwadak, had sana skwi dza'a sabi da tsi na zlambintá mndu wa. ¹¹ Mndu husan zwanamani ná, ma grum nzatá nzakwani, ta tadamaku tsa mndu ya ma grum. Sna a ta vli ta mba da tsi ta mba da mida wu, kabga tdi kanaf tdi ka grum ta irani.

Ma dvu kuni ta ghana hadik

† 2:7 Ngha ta Yuhwana 13:34.

¹² Zwana da, ka yu ta vindaghunafta na: «Plighunis pla Lazglafta ta dmakuha ghuni, kabga slna Yesu Kristi ta magata.» ¹³ Kaghuni dadaha, ka yu ta vindaghunafta na: «Nda sna kaghuni ta tsa mndu ta nzakway daga ta kul zlraftá† inda skwi ya.» Kaghuni duhwalha, ka yu ta vindaghunaftá kaghuni guli na: «Ghubasapghubasa kaghuni ta halaway.»

¹⁴ Kaghuni zwani, ka yu ta vindaghunafta na: «Nda sna kaghuni ta Da mu Lazglafta.» Kaghuni dadaha, ka yu ta vindaghunafta na: «Nda sna kaghuni ta tsa mndu ta nzakway daga ta kul zlraftá inda skwi ya.» Kaghuni duhwalha, ka yu ta vindaghunafta na: «Nda mbra kaghuni, nzamza gwada Lazglafta ma kaghuni, ka ghubasaptá kuni ta halaway.»

¹⁵ Ma hara'u kuni ta tva nzakwa mnduha ma ghəŋa hadik. Ma laghu kuni ngha skwiha ma ghəŋa hadik. Ka laghula mndu da hara'uwa skwiha ma ghəŋa hadik katsi ná, dva a tsa mndu ya ta Da mu Lazglafta wa. ¹⁶ Skwi ta magə mnduha ma ghəŋa hadik ná, maga skwi kumaf slu'uvgha taŋ nda skwi kumaf ira taŋ ya. Mutsafta taŋ kay guli, glay taŋ ta ghəŋ nda tsi. Mndərga tsahaya ma nzaku ná, Da mu Lazglafta a ta taghamafta wu. Ŋa na ghəŋa hadik na mndərga tsaya. ¹⁷ Dina ka snaŋta kaghuni kazlay: Ta kdakukdaku nana ghəŋa hadik na kə'a. Inda na skwiha ta mamə mnduha na guli ná, dza'a kdúkda. Mndu ta maga skwi ta kumə Lazglafta ya ná, tsaya mndu dza'a nzata nda hafu ŋa kdekeden.

† **2:13** Gray nda 1:1.

Ghuma Kristi

¹⁸ Zwana da, ndusa ghəŋa hadik ka kɔaku, manda va ya sɔaŋ kuni kazlay: Dza'a saghasa ghuma Kristi kə'a ya ná, daga ndana ná, sli'agapsli'a ghumaha Kristi. Tsaya ta gramafta kazlay: Ndusa kɔakwa ghəŋa hadik§ kahwathwata kə'a. ¹⁹ Tsa ghumaha ya ná, mataba mu sli'agapta həŋ. Si nza a nzakwa taŋ kawadaga nda amu wa. Ka má nda nza nzakwa taŋ kawadaga nda amu ná, má gɔavagda həŋ tavata amu. Magamaga manda tsaya kabga ŋa sɔaŋta kazlay: Mataba amu a həŋ demdem wu kə'a.

²⁰ Kaghuni ya, vlaghunavla Kristi ta Sulkumani. Kaghuni demdem, nda sna kaghuni ta vərda skwi ta ghəŋa Yesu Kristi. ²¹ Kəl yu ka vindaghunafta na: «Kwalaghuni kul sɔaŋtá vərda skwi a wu, kabga nda sna kuni.» Nda sna kuni guli kazlay: Guya a tsakalawi ta vgha nda kahwathwata wu kə'a.

²² Wa va na mghama tsakalawi na? Mndu ta vziŋtá Yesu kazlay: Kristi a wu, ka'a a tsa wa. Tsa mndu ya ná, ghuma Kristi ya ta vziŋta i Lazglafta nda Yesu tani ya. ²³ Dər wati ma mndu ta vziŋtá Zwaŋa Lazglafta ná, had' tvani ŋa nzuvta nda Lazglafta ta nzakway ka Dani wa. Ala dər wati ma mndu ta mnay banluwa kazlay: Yesu ná, Zwaŋa Lazglafta ya kə'a, nda nza nzakwani nda Lazglafta ta nzakway ka Dani* guli.

²⁴ Kaghuni, ŋanawa ŋa ta tsa skwi sɔaŋ kuni daga zlafta ghuni ta zlghaftá gwada Lazglafta ya. Ka

§ 2:18 Ngha ta Mata 24:5, 23-24, Markus 13:21-22. * 2:23 Ngha ta Mata 11:27, Yuhwana 5:23, 15:23.

ɲanaɲa kuni ta tsa skwi snaɲ kuni daga zlafta ghuni ta zlghaftá gwaɗa Lazglafta ya katsi, dza'a gɗavagɗa nzakwa ghuni kawadaga nda Zwanɲ nda Lazglafta guli. ²⁵ Ka Kristi tamaftá imi ta sləmənɲ ná, dza'a vlaghunavla yu ta hafu ɲa kɗekedzen, ka'a.

²⁶ Vindaghunafvinda yu ta tsa skwiha ya, kabga ka maga kuni ta ɗasuwa nda tsa gwal ta kuma hla sɛla ghuni ya. ²⁷ Kaghuni, tsa Sulkum vlaghuna Kristi ya ná, ta nzaku ma kaghuni. Wya ta mamu tsa Sulkum ya ma ɲuɗufa ghuni ya, psəgla a kuni ta sana mndu ɲa taghaghunaftá sana skwi wu, kabga ta taghaghunaftagha tsa Sulkum ya ta inda skwi. Tsa skwiha ta taghaghunafta tsi ya guli ná, vɛrɗa skwiha ya. Haɗ tsakalawi mida wa. Gɗavawagɗa kawadaga nda Yesu Kristi manda ya ta taghaghunafta Sulkumani.

²⁸ Mantsa tama zwana ɗa, gɗavawagɗa kawadaga nda Yesu Kristi, ɲa kwala zlən ksa amu baɗu vragata dza'a vragata tsi, ɲa kwala hula ksa amu guli ta kəmani.

Zwana Lazglafta amu

²⁹ Ka si nda sna kuni kazlay: Tuɗukwa mndu Yesu Kristi kə'a, nda ra guli ka snaɲta ghuni kazlay: Gwal ta maga skwi tɗukwa ná, zwana Lazglafta hən kə'a.

3

¹ Nghawa ka Da mu Lazglafta ɗvutá amu 6a! Zwana ɗa kə'a ta hga amu. Manda va tsaya nza-kwani guli, zwana Lazglafta* amu. Tsaw sna a

* **3:1** Ngha ta Yuhwana 1:12.

mnduha ma ghəŋa hađik ta amu wu, kabga sna a həŋ ta Lazglafta wa. ²Zwanama da, daga ndanana zwana Lazglafta amu. Nziya nza tsi, tsa nzaku ka mu dza'a nzakway ta kəma ya na, ta ma difa karaku. Tsaw nda sna amu kazlay: Bađu vragata dza'a vragata Kristi na, dza'a nzakway amu manda tsatsi ka'a, kabga dza'a nda ngha mu ta nzakwani. ³Ka si mantsa tsi katsi, inda mndu ta fafta ghəŋani ta Kristi na, dza'a waray ta ghəŋani da dmaku manda ŋa Kristi kul gata dmaku ya.

⁴Ka ta gdagda mndu ta maga dmaku katsi na, sna a tsa mndu ya ta zlaha Lazglafta wa. Dmaku na, kwal kul sna zlaha Lazglafta ya. ⁵Wya nda sna kaghuni kazlay: Sasa Yesu Kristi ta ghəŋa hađik da klaghuta dmakwa mnduha ka'a. Tsatsi na, hađ dmaku dekdek tida wa. ⁶Inda mndu ta gdavata kawadaga nda Yesu Kristi na, hađ ta gagelta dmaku wa. Inda mndu ta gdata ta maga dmaku guli na, ta tsatsa fa ta Yesu Kristi wu, ta sna a guli wa.

⁷Mantsa tama zwana da, ma snə kuni ta bara mnduha. Mndu ta gdata ta maga skwi tdukwa na, tdukwa tsa mndu ya manda nzakwa Yesu Kristi ka mndu tdukwa ya. ⁸Mndu ta gdata ta maga dmaku na, mista halaway tsa mndu ya, kabga ta maga dmaku halaway daga ka yawu zraftani ta gata. Tsaya kał Zwanə Lazglafta ka saha. Sahani ta ghəŋa hađik na, ŋa zlinta slna halaway.

⁹Dər wati ma mndu ta nzakway ka Zwanə Lazglafta, hađ ta ga dmaku wu, kabga mamu Sulkuma Lazglafta ma ŋudufani. Hađ ta kdanja maga dmaku dekdek wu, kabga nda nza Lazglafta ka Dani. ¹⁰Dər wati ma mndu kul hađ ta

maga skwi tđukwa, nza a tsa mndu ya ka Zwanja Lazglafta wa. Mantsa ya mndu kul đva zwanjamani guli. Ta tsahaya ta tsatsafta lu ta nzakwa zwana Lazglafta nda nzakwa zwana halaway.

Dvuma mndu manda ŋa Kristi

¹¹ Daga zlrafta ghuni ta zlghaftá gwada Lazglafta mnaghunata lu kazlay: Dvumadva ta sani nda sani† kə'a. ¹² Yaha amu da nzakway manda Kayinu. Tsatsi ná, nda nza ka zwanja halaway, ka dzatá tsi ta zwanjamani. Kabgawu kəl tsi ka dzata na? Kabga ghwadaka skwi ŋa Kayinu ta magay, tđukwa‡ skwi ŋa tsa zwanjamani ya ta magay, kəl tsi ka valafta tida ka dzata.

¹³ Zwanama da, ka ta husanhusa§ kuni ta mnduha ma ghəŋa hadik katsi, yaha da nzakway ka skwa ndərmimay da kaghuni. ¹⁴ Amu ná, nda sna amu kazlay: Sabsa amu ma mtaku ka nzata nda hafu* kə'a, kabga ta đvuta amu ta zwanama mu. Mndu kul đva zwanjamani ná, ma mtaku ta gđavata tsatsi. ¹⁵ Mndu husan zwanjamani ná, mnda dzatá mndu tsa mndu ya. Nda sna kaghuni guli kazlay: Mndu ta dzatá mndu ná, ta mutsa a hafani ŋa kdekedzeŋ wu kə'a. ¹⁶ Wya tvi kəl amu ka snanťa skwi ta hgə lu ka đva mndu: Dvuđva Yesu Kristi ta amu, ka saha tsi vlatá ghəŋani ma vla amu. Amu guli ná, vlamavla amu ta ghəŋa mu guli ma vla zwanama mu. ¹⁷ Ka mamu skwi da mndu, ka nghanťa tsi ta zwanjamani ta pđay, ka laghu

† **3:11** Ngha ta Yuhwana 13:34. ‡ **3:12** Ngha ta Zlrafta 4:1-8.
 § **3:13** Ngha ta Lukwa 6:22, Yuhwana 15:18-19. 17:14. * **3:14**
 Ngha ta Yuhwana 5:24.

tsi da nghay nda iri† katsi ná, laviŋ a tsa mndu ya ta mnay kazlay: Ta dɔvay yu ta Lazglafta kə'a wa. ¹⁸ Zwana da, gwadaɣ ma wi kwenkwenj a dɔva zwanama wa. Dvamaɔva kahwathwata ma ɲudufa mu, ka maga mu ta skwi manda tsaya.

¹⁹ Mantsa ya dza'a grafta mu kazlay: Ta mbaɔa ta vərɔa tvi mu ta mbaɔa kə'a. Tsaya tama ná, nda lɔa ɲudufa mu ta kəma Lazglafta. ²⁰ Ka ta dga ghəŋ mu ta ghəŋa skwi maga mu katsi, nda sna amu kazlay: Mal Lazglafta nda sna ta inda skwi ta magə mu ka ɲudufa mu kə'a. ²¹ Zwanama da, ka haɔ dga ghəŋ ta dgə mu ta ghəŋa skwi maga mu wu katsi, waɔah vgha mu ta sladu ta kəma Lazglafta. ²² Dər má nu ɔawaŋ mu da tsi ta vlamavla kabga ta snanasna mu ta zlahani, ta maganamaga mu ta skwi ta zɔəganata. ²³ Ká tsa zlaha Lazglafta ya ta mnay na: «Fafwafa ta ghəŋa ghuni ta hga Yesu Kristi zwanani, ka dɔvuvusta kuni ta vgha ghuni sani nda sani,» ka zlahani ta mnamata‡. ²⁴ Mndu ta sna zlaha Lazglafta ná, ta gɔavagɔa kawadaga nda Lazglafta, ta gɔavagɔa Lazglafta guli kawadaga nda tsatsi. Nda sna amu guli kazlay: Ta gɔavagɔa Lazglafta ma amu nda ma Sulkum ya vlama tsi kə'a.

4

¹ Zwanama da, ma gi sna kuni ta gwada mndu ta mnay kazlay: Mamu Sulkuma Lazglafta ma i'i kə'a ya. Daslawa tsa skwi ta mnə tsi ya karaku, ka mamu Sulkuma Lazglafta* mida, ka haɔ wa a

† **3:17** Ngha ta Vrafta ta Zlahu 15:7-8. ‡ **3:23** Ngha ta Yuhwana 13:34, 15:12, 17. * **4:1** Ngha ta Vrafta ta Zlahu 13:2-6.

tsi. Kəl yu ka mna tsaya ná, kabga nda ndəgha ghwadaka anabiha ta sli'agapta ta ghəŋa hadik. ² Ka mnaghunamna yu ká kuni dza'a graftá mndu nda Sulkuma Lazglafta mida 6a: Ka ta mnay mndu kazlay: Yesu ná, Kristi ya, sa daga da Lazglafta, ka yatá lu, ka mndu kə'a ná, mamu Sulkuma Lazglafta ma tsa mndu ya. ³ Ka had tsa mndu ya ta mnay kazlay: Manda tsaya nzakwa Yesu kə'a wu ná, had Sulkuma Lazglafta ma tsa mndu ya wa, sulkuma ghuma Kristi mida. Nda ghada snan̄ta ghuni ta mnay kazlay: Dza'a saghasa tsa ghuma ya kə'a. Nda ghada saghani ndanana tama ta ghəŋa hadik.

⁴ Kaghuni zwana da, zwana Lazglafta kaghuni, ghuḅasapghuḅasa kaghuni ta tsa gwal nana mndu ya, kabga mal tsa Sulkum ma kaghuni ya mbratani ka tsa sulkum ma gwal ma ghəŋa hadik ya. ⁵ Hahəŋ ná, ŋa ghəŋa hadik həŋ. Tsaya ta kəl həŋ ka mna skwi ta zdəganatá mnduha ma ghəŋa hadik. Ta fana fa mnduha ma ghəŋa hadik ta sləməŋ ta həŋ guli ka snay. ⁶ Amu ná, zwana Lazglafta mu. Mndu nda sna ta Lazglafta ná, ta snay ta skwi ta mnə ŋni. Ka Zwan̄a Lazglafta a mndu wu katsi ná, fa a ta sləməŋ ka sna skwi ta mnə ŋni wa. Mantsa ya ta tsatsafta mu ta gwal nda vərda Sulkum ma həŋ nda gwal nda sulkuma nana mndu ma həŋ.

Lazglafta ná, d̄vu ya

⁷ Zwanama da gwal d̄vu yu, gd̄magda ta d̄vutá sani nda sani. Tva d̄vutá mndu ná, ta sagha daga da Lazglafta. Inda mndu ta d̄vutá mndu guli ná, nda na tsa mndu ya ka Zwan̄a Lazglafta, nda

sna ta Lazglafta guli. ⁸ Mndu kul dʋutá mndu ná, sna a tsa mndu ya ta Lazglafta wu, kabga nzakwa Lazglafta ná, dʋu ya. ⁹ Wya ká Lazglafta maramañtá tva dʋa mndani: Ghunagaghuna ta zwanjani turtuktuk ta ghəŋa hađik kada nzakwa mu nda hafu ma tsatsi†. ¹⁰ Tinjəl Lazglafta ta dʋutá amu ka ghunagatá tsi ta Zwanjani ka saha da mtuta ŋa pla ghəŋ ŋa plamata Lazglafta ta dmakwa‡ mu. Tsaya na vərđá dʋutá mndu, da thə amu kazlay: Tinjəl amu ta dʋutá Lazglafta kə'a.

¹¹ Zwanama da gwal ta dʋu yu, ka si mantsa ya dʋuta Lazglafta ta amu katsi ya, dʋama dʋa amu guli ta vgha mu sani nda sani. ¹² Hađ mndu ta kəđ nghanťá Lazglafta§ nda irani wa. Tsa dʋutá vgha mu ta dʋuta mu sani nda sani ya ná, nzakwa Lazglafta ta gđavata kawadaga nda amu tsa. Ta dʋudʋa mu ta Lazglafta dar manda ya kumaŋ tsi kə'a guli.

¹³ Lazglafta ná, vlamavla ta Sulkum. Tsaya kəl mu ka grafta kazlay: Ta gđavagđá amu kawadaga nda tsi, tsatsi guli ta gđavagđá kawadaga nda amu kə'a. ¹⁴ Ghunaga ghuna Lazglafta ta zwanjani ta nzakway ka mnda mba mndu ta ghəŋa hađik*, ka nghanťá aŋni nda ira ŋni, tsaya ta mnə aŋni ŋa mnduha. ¹⁵ Mndu ta mnay banluwa kazlay: Yesu ná, Zwanja Lazglafta ya kə'a, nda nza nzakwa Lazglafta nda tsa mndu ya, nda nza nzakwa tsatsi guli nda Lazglafta. ¹⁶ Amu ná, nda sna amu kazlay: Dʋudʋa Lazglafta ta amu. Ta tsaya fafta amu guli

† **4:9** Ngha ta Yuhwana 3:16. ‡ **4:10** Ngha ta 2:2. § **4:12** Ngha ta Yuhwana 1:18. * **4:14** Ngha ta Yuhwana 3:17, 4:42.

ta ghəŋa mu.

Lazglafta ná, d̥vu ya. Tsaya tama, mndu ta gdata ta d̥va mndu ná, nda nza nzakwani nda Lazglafta nda nza nzakwa Lazglafta guli nda tsatsi. ¹⁷ Dza'a kəl amu ka grafta kazlay: Ta d̥vay amu ta Lazglafta dar kə'a ná, wya tsi: Bađu tsa fitik dza'a tsə Lazglafta ta guma ta ghəŋa mnduha ya ná, had amu dza'a zləŋa tsa guma ya wu, kabga nda nza nzakwa mu ta ghəŋa hadik ka guram nda Yesu. ¹⁸ Ka nda sna amu kazlay: D̥vuđva Lazglafta ta amu, had amu dza'a zləŋay wa. Tsa d̥vutađvu Lazglafta ta amu ya ná, ta hliŋtá zləŋ dekdek ma amu. Ala, ka tata zləŋ mndu katsi, murmura ŋuđufani, ta fa a ghəŋani ta tsa d̥vuđvu Lazglafta ya wu, kəl tsi ka zləŋ.

¹⁹ Amu ná, d̥vuđva mu ta Lazglafta kabga tinəl tsatsi ta d̥vuta amu. ²⁰ Ka «d̥vuđva yu ta Lazglafta» ka mndu, tata husaŋhusa zwanamani katsi ná, tsakalawi tsa ta tsakal tsa mndu ya, d̥vu a ta Lazglafta wa. Ka d̥vu a mndu ta zwanamani ya nghan tsi nda irani wu katsi ná, waka a dza'a d̥vutá Lazglafta ya kul nghan tsi na? ²¹ Ka d̥vuđva yu ta Lazglafta ka mndu katsi ná, ka d̥vuđva tsi ta zwanamani† guli, ka zlah a Kristi mnata.

5

Zlghafta ta Zwanə Lazglafta, tsaya ghubasaptá ghəŋa hadik

¹ Dər wati ma mndu ta zlghaftá mnay kazlay: Yesu ná, Kristi ya kə'a, tsa mndu ya ná, nda na ka

† 4:21 Ngha ta Mata 22:36-40, Markus 12:28-31, Lukwa 10:25-28.

Zwanja Lazglafta. Ka dʋudʋa tsa mndu ya ta Dani Lazglafta katsi ná, dza'a dʋudʋa guli ta zwana Lazglafta. ² Ka dʋudʋa mu ta Lazglafta, ta snay mu ta zlahani guli ná, tsaya kəl amu ka snanʔa dʋudʋa mu ta Zwana Lazglafta kə'a. ³ Snata mu ta zlaha Lazglafta ná, tsaya dʋafta mu ta Lazglafta kahwathwata. Bla a tsa zlahuhani* ya guli wa. ⁴ Inda zwana Lazglafta ná, ghuḅasapghuḅasa hən ta ghənja hadik. Nda ghuḅasa ghənja hadik, kabga nda fa ghənja mu ta Yesu Kristi. ⁵ Wa mndu ta ghuḅasaptá ghənja hadik na? Ba mndu ta zlglafta kazlay: Yesu ná, Zwanja Lazglafta ya kə'a ta ghuḅasapta.

Masləmtsəka Yesu Kristi

⁶ Yesu Kristi ná, sasa ta ghənja hadik, ka lamə tsi nda ma ima batem, ka pghinʔá tsi ta usani ma mtakwani†. Lami nda ma ima batem kwenkwenj yeya wu, pghinʔgha ta usani guli. Sulkuma Lazglafta ta mnamatá tsa skwiha ya kazlay: Mantsa ya nzakwani kə'a, kabga had tsatsi ta tsakalawi wa. ⁷ Hkən skwi‡ ta maramanʔa kazlay: Yesu ná, Zwanja Lazglafta ya kə'a. ⁸ Tsa skwiha hkən ya ná, mamu Sulkuma Lazglafta, nda imi, nda us. Tsa skwiha hkən ya ná, ka skwa turtuk gwada taŋ. ⁹ Ka si ta tsu'ay mu ta gwada ta mnata mnduha ta ghənja skwi ta nghanʔa hən ya ní, malaghumala a ŋa Lazglafta ma gwada ta mnata, ka ŋa mnduha ra? Lazglafta ka ghənani ta mnanʔá tsa skwiha ya ta ghənja zwanjani. ¹⁰ Mndu

* **5:3** Ngha ta Yuhwana 14:15. † **5:6** Ngha ta Yuhwana 19:34.

‡ **5:7** Ngha ta Vrafta ta Zlahu 19:15.

ta zlgħaftá Zwanja Lazglafta ná, nda sna tsatsi kazlay: Kahwathwata tsa skwiha ya kə'a. Mndu kul zlgħaftá Lazglafta guli ná, niŋna ta Lazglafta ka tsakalawi, kabga kwalani kul zlgħaftá skwi mna Lazglafta ta ghəŋa zwanjani. ¹¹ Vlamavla Lazglafta ta hafu ŋa kdekedzenj. Tsa hafu ya guli ná, nda ma zwanjani Yesu ta mutsakwa tsi. Mantsa ya ka Lazglafta mnamata. ¹² Mndu ta zlgħaftá Zwanja Lazglafta, nda mutsa hafani. Mndu kul zlgħatá Zwanja Lazglafta guli ná, mutsa a hafaniŠ wa.

Hafu ŋa kdekedzenj da Lazglafta

¹³ Vindaghunaf vinda yu ta tsa skwiha ya, ŋa kaghuni gwal ta zlgħaftá Zwanja Lazglafta, kada grafta kuni kazlay: Mutsafmutsa kuni ta hafu ŋa kdekedzenj kə'a. ¹⁴ Ta lagha mu ta kəma Lazglafta da dawwa skwi manda ya ta zdəganata ná, har ghəŋa mu, kabga ta snamasna. ¹⁵ Ka nda sna mu kazlay: Ta snamasna ta inda skwi ta dawu mu da tsi kə'a, nda sna mu guli kazlay: Ta vlamavla kahwathwata ta inda skwi dawəŋ mu kə'a.

¹⁶ Ka nda nŋha mndu ta zwanjani ta ga dmaku, dza'a kwal kul klaghata da mtaku ŋa kdekedzenj katsi, ka maga tsi ta du'a da Lazglafta ta ghəŋa tsa mndu ya ŋa vlanja Lazglafta ta hafu. Tsa hafu ya, ŋa gwal ta ga dmaku dza'a kwal kul klagħatá həŋ da mtaku ŋa kdekedzenj dza'a vla lu. Mamu dmaku ta kla mndu da mtaku ŋa kdekedzenj. Mna a i'i kazlay: Ka maga kuni ta du'a da Lazglafta ta ghəŋa mndərga tsaya kə'a wa. ¹⁷ Inda skwi ta magə lu kul dīnaku ná, dmaku ya. Nziya nza tsi, mamu dmaku kul haf ta kla mndu da mtaku ŋa kdekedzenj.

Š 5:12 Nŋha ta Yuhwana 3:36.

¹⁸ Nda sna amu kazlay: Dər wati ma mndu ta nuta ka Zwaṇa Lazglafta ná, hađ ta gəgəltá dmaku wa. Zwaṇa Lazglafta ta nghay, laviṇ a halaway ta ksaṇta wa.

¹⁹ Nda sna amu kazlay: Nda na amu ka zwana Lazglafta kə'a. Sanlaha ma mnduha ta ghəṇa hađik ná, ta ma dzva halaway həṇ demdem.

²⁰ Nda sna amu guli kazlay: Sasa Zwaṇa Lazglafta ta ghəṇa hađik ka vlamatá tsi ta dífil ṇa snaṇtá vərđa Lazglafta kə'a. Ka ndi'aftá mu ta vgha nda vərđa Lazglafta nda ya nda zwaṇani Yesu Kristi. Tsatsi ná, vərđa Lazglafta ta vlamatá hafu ṇa kdekeden ya.

²¹ Zwana da, dasuwa ka kuni, yaha kuni da ṇana vgha nda skwa wuyay.

Deftera Lfida Dzratawi New Testament in Hdi

copyright © 2013 Wycliffe Bible Translators, Inc.

Language: Hdi

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2013, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Hdi

© 2013, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 11 Nov 2022 from source files
dated 29 Jan 2022

f257b780-c0dd-5cce-9b20-430484439898